



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim


tiryimiyim@aolima

tir yimiyim

TAPAK 3

Admiral R Hari Kumar India navy tekolakba kumogo

Sanjay Dutt-i AP atema brand ambassador inyaktsu



VOL. XIX NO. 54 (ADOK 54) DIMAPUR

RASEMNÜ (WEDNESDAY) LUCHII (DECEMBER) 01, 2021

₹ 5.00

## Statehood Day sentong nung HoD aser Gaon Bura ajak adentsüla

**Dimapur, November 30, 2021 (TYO):** December 1, 2021 nü Nagaland Civil Secretariat Plaza nung 59 buba Statehood Day benjung amongdang Kohima HQ nung Office ajak nung tekolakpurtem aser Kohima Sadar (Urban & Rural) kübok Gaon Bura ajak adentsüla

metetdaksüogo. District Office ajak nung tekolakpurtem aser Gaon Bura tem Compulsory Attendance alitsü anungji ajak adentsü tuyur aser tashi mangartem merenshitsu ta Kohima Deputy Commissioner, Gregory Thejawelie, NCS-i sangdong ka nung ashi.

## NCD-i benjung mapang sarusaji masütsü ayongzüker

**Dimapur, November 30, 2021 (TYO):** Nagaland nung Khristmas aser Küm Tasen benjung amongba mapang union balala, Naga yimten teloktem dena tanga loktitentetemi aser state sorkar department temi ozüngi memelaba sarusaji masütsü mepishir ta Naga

Council Dimapur-i metetdaksüogo. Asen lima nung Yisu Khrista asoba benjung tiptema amongtsü atema sarusaji masütsü ayongzüker, ta NCD-i ashi. NCD-isa nisung ajak dang Khristmas aser 2022 Küm Tasen salem metetdaksüogo.

## Dec 5 & 6 anogotem tzünglu kanga arutsü

**Guwahati, November 30, 2021 (Agencies):** Taruba anogotem Northeast state 5 nung tzünglu kanga arutsü ta Indian Meteorological Department (IMD)-i metetdaksüogo. December 5 aser 6 anogotem Assam, Meghalaya, Arunachal, Nagaland aser Manipur nung tzünglu kanga arutsü ta IMD-i ashi. "South Thailand aser anameta aliba Andaman Sea temalen mopung temekong akümtsü aser December 3 nung ibaji yipru kümer aontsü" ta IMD indang DGM, Dr Mrutyunjay Mohapatra-i ashi.

"December 3 nungi yipru 40-60 kmph tashi nung aon tenzüksü aser December 4 anepdang tashi nung Andhra Pradesh aser Odisha tzükümlen atongtsü. Bay of Bengal madak mopungji 90-110 kmph tashi aontsü" ta Dr Mrutyunjay-isa ashi. "December 2 nungi tzüyimleni maotsü atema onoki angopurtem dang shiogo. Maneni Andhra Pradesh, Odisha, West Bengal aser Northeast state tem dang tsününisenbongtsü kümzüka ayutsü shiogo kechiyong yipru aser tzünglu ajanga raksatsütsü" ta paisa metetdaksü.

## COVID-19 Nagaland: 13 dak putet & 19 taneptsü angu

**Kohima, November 30, 2021 (TYO):** Nagaland nung Mongulbarnü nisung 13 dak COVID-19 putet aser nisung 19 taneptsü angu. "Tanü putetertemji Dimapur nung nisung 9 aser Mokokchung nung 4 lir" ta Integrated Disease Surveillance Project atema State Nodal Officer, Dr Nyanthung Kikon-i ashi. "Taoba ghonda 24 tsüngda nisung 19 taneptsü angu. Parnokji Mokokchung nung 15, Kohima nung 2 aser Dimapur o Kiphire nung kaka (1) lir" ta paisa ashi. Tang nisung 133 anepaludar daka parnok 104 dakbo shirangba yimya kecha mali, ta paisa shisem.

"Hombar tashi nung nisung 739,201 nem COVID-19 vaccine indang dose 12,86,982 agütsüogo" ta State Immunization Officer, Dr Ritu Thurr-ia ashi. "Vaccine agirtemji frontline workers 60,979, healthcare workers 15,999, arishi küm 45 ser tempur 209,253 aser arishi küm 18 nungi 44 tsüngda alir 452,970 lir" ta paisa ashi. "Vaccine agirtem rongnungi nisung 547,781-i dose anaprong agiogo. Parnokji frontline workers 48,513, healthcare workers 13,509, arishi küm 45 ser tempur 172,913 aser arishi küm 18 nungi 44 tsüngda alir 312,846 lir" ta Dr Thurr-isa ashi.

## NU-i UG tatidang offline nung agitsü

**Dimapur, November 30, 2021 (TYO):** Nagaland University (NU)-i under graduate course tem atema offline mode nung tatidang agitsü nenshia metetdaksüogo. NU-i routine renema aliba ama odd semester atema UG tatidang agitsü ta yashi sangdong ka nung metetdaksü. Nagaland University aser Department of higher education ketdangpurtemi college principal tem den rongdak senden ka amending iba telemetba agi. Parnoki UG examinations 2021 offline agitsü bangjemtep. "Kaketshirtem den loktiliba ajungtsü mechi nung lemteta aliba ama tatidang offline mode nung

dang agitsü bangjemshiogo" ta Nagaland University-i sangdong ka nung ashi. NU-i offline mode nung tatidang agitsü osang metetdaksüba sülen Nagaland nung kaketshirtemi online mode nung ang agiang ta takhangba agüja arur. Mongulbarnüa Dimapur kübok Supermarket tesem nung kaketshirtemi lungkak aitba sentong ka ayonga agi. Ajisüaka, All Nagaland College Students Union (ANCSU) ketdangpurtemi kaketshirtem dang lungkak aittsü melena lesson bushitsü tayongzüka agütsür senshidaksü.

## Hornbill Festival kanga kümdanga amongtsüla: HFW Dept.

**Kohima, November 30, 2021 (TYO):** Bodbar nungi anogo ternü Hornbill Festival nung nisung ajaki SOPs aser COVID-19 inyakyim benshitsu mepishir ta Nagaland Health & Family Welfare Department (HFW)-i metetdaksüogo. "State sorkar aser Health Department-i Nagaland nung low positivity rate 1.7% dang aliba nung ajemdaker taküm Hornbill Festival amongtsü lemtet" ta HFW Department Principal Director, Neikhrielie Khimiao-i ashi.

Ajisüaka, district ajak nem tetuyuba agütsüogo, ta pai ashi. Hornbill Festival atema health department-i Kohima, Dimapur aser Mon district asem nem osang agütsüogo, kechiyong entry points asem nung Special COVID Care Management Center lapokogo, ta Principal Director-isa metetdaksü. Naga Heritage Village, Kisama nung medical team ka mapa lemzüksütsü aser parnok ket nung vaccination, screening aser testing kits alitsü ta paisa ashi.

HFW Department-i sorkar aser Tourism department dang tangalen nungi aruba nisungtem screen asütsü atema osang agütsüogo, ta Principal Director Neikhrielie Khimiao-isa ashi. Hornbill Festival nung nisung kanga adenshiba noktangtsü lateta lir mali ta osangbenieri asüngdangdang "nisungtemi lateta aliba inyakyim sülen anidaktsübaji district administration aser department tem yaritepa inyaktsüla" ta Dr Khimiao-i langzü.

Hornbill Festival nung Covid-19 menatempa aotsü tarendakba lir mali ta asüngdangdang "SOPs sülen shitak anidakra ibaji mataloktsü" ta paisa langzü.

**INVITATION**

THE DEPARTMENT OF TOURISM  
UNDER THE AEGIS OF THE GOVERNMENT OF  
NAGALAND SOLICIT YOUR ESTEEMED  
PRESENCE AT THE

**22nd**  
*Hornbill*  
**FESTIVAL 2021**

**CHIEF HOST** **CHIEF GUEST**  
**NEIPHIU RIO** **PROF JAGDISH MUKHI**  
HON'BLE CHIEF MINISTER OF NAGALAND HON'BLE GOVERNOR OF NAGALAND

**FESTIVAL HOST** **GUESTS OF HONOUR**  
**H. KHEHOI YEPUTHOMI** **A) MR. NAOR GILON**  
HON'BLE ADVISOR, TOURISM AND ART AND CULTURE AMBASADOR OF ISRAEL TO INDIA


**FESTIVAL FATHER** **B) MS. MELINDA PAVEK**  
**MANNYEM WANGNAO** **UNITED STATES, CONSUL GENERAL**  
LONGWA VILLAGE, MON DISTRICT

**C) MR. MANFRED AUSTER**  
CONSUL GENERAL OF GERMANY

**INAUGURAL FUNCTION**  
**1st DECEMBER 2021, 16:00 HRS**  
**NAGA HERITAGE VILLAGE KISAMA**



# Fazl Ali College, Mokokchung nung kaket ana saya



**Dimapur, Yimpoksüi/Nov. 30 (TYO):** Dr. Maongsangba, Controller of Examinations, Nagaland University ajanga Fazl Ali College, Mokokchung indang conference hall nung November 30, 2021 nü kaket ana, "A Study Guide on Issues in World Politics" aser "A Study Guide on Local Self Government" sayaja liasü.

Iba sentong nung Dr. Maongsangba-i kaket zülur nem tenüngsang agütsü aser shisaliok tajungtiba agütsüba nung iba kaket ana yagi yarisemtsü, ta ashi.

Kaket ana ya Department of Political Science, FAC nung

Assistan Professor, Dr. E. Benrithung Patton-i zülua liasü. Political science nung undergraduate pur atema guide book tajung nungdaker ta angateta kaketshirtem ajangzüksü mechi iba kaket ana ya zülü, ta kaket züluri ashi.

Nagaland University nung kobi melie Choice Based Credit System (CBCS) amshia aotsü alunung, kaket ana ya tesayur aser kaketshir atema tongtipang asütsü imlar, ta pai ashi.

Iba sentong nung Dr. Phyoenthung, Assistant Professor, Department of Political Science, FAC ajanga

kaket ana indang 'review' agütsü aser study material tabensa aser tajung ana lir, ta ashi.

Iba kaket nung keta alibatam ya kaketshirtemi angatetsüsa lir aser University syllabus nung aliba ama arangtepa lir, ta pai ashi.

Iba sentong nung Dr. Lanurenla, Coordinator IQAC, FAC menden liasü, aser laia kaket zülur nem tenüngsang agütsü aser College nung Dr. E. Benrithung Patton ama aliba ya rongsen tulu amai lir, ta ashi.

Iba sülen Pastor William Patric ajanga kaket meshiteta sarasadema sentong tembanga liasü.

# Governor-i Eduversity Cares2 semzüksü

**Dimapur, Yimpoksüi/Nov. 30 (TYO):** Assam aser Nagaland indang Governor, Prof Jagdish Mukhi-i November 30, 2021 nü Hotel Vivor, Kohima nung Eduversity Cares2 semzüksüba mapang Eduversity Group ajanga kaketshir tetsürtem yaritsü asoshi mapa tajung inyakba atema pelashishia agizük aser tenüngsang agüja liasü.

Iba telok indang nukjidadong tulutibaji sempet aliba kaketshirtem jangjateta IAS, IPS aser IFS officer adokdaksütsüla, ta pai ashi aser Eduversity Group dang tajung atema milen abener asütsü

ajungshia liasü. Chairperson, Nagaland State Commission for Women, Khrienuo Tachu-i tetushi tesemdanger ka ama jembiba mapang kaketshir tetsür dak rangloker iba ama sentong tajung yangluba atema Eduversity Group indang CEO, MD aser kilem tenzüker dang pelaba lemsatepa liasü.

Naga tsürtem iba 21st century nung tali temetetba aser tali tawajemba nung lir, anungji iba sentong yagi Naga tsürtem nem jenjang balaka nung tashi agütsütsü imlar, ta lai ashi.

Iba sentong nung Chief operating Officer, Eduversity Group, Prakash Nayak-i jembiba mapang, kaket reju nung kaketshir tetsürtem class aser shisaliok bushiba nung makoksai 'monthly cycle' anepalutsü asoshi iba sentong ya renem, ta ashi.

Iba sentong kibok kaketshir tetsürtem ita shilem ao tenzüka mapang ananü leave angutsü, koba sadoksayim masüba mapang ka amai züngshir. Leave ya voluntary basis nung lir aser class madenba ya Honibar anogotem nung awajemtsü, ta pai ashi.

# Kohima nung lokti nübudok ali

**Dimapur, Yimpoksüi/Nov. 30 (TYO):** Hornbill benjongmung aser December 1, 2021 nü Statehood Day amungtsü aliba mechi Kohima nung November 30, 2021 nü lokti nübudok ayongzüka ali, kong state sorkar mapa inyaker ajak, ward/colony/yimtsüng nung lenirtem aser nüburtemi shilem agia liasü.

Deputy Commissioner,

Kohima, Gregory Thejawelie, NCS ajanga o tatsüka jembiba mapang lenirtem ajungshia liasü aser district nung inyaksü ya maongka lir saka maongka den tebilemstü khuret aika lir, ta ashi.

Asen yimti müreka ayutsü atema ketdangsür ajungai shilem agitsü kanga tongtipang lir, aser ibaji ajanga Kohima tebour jungdaksütsü aser 'most

liveable city' kumdaksütsü, ta pai ashi.

Lokti nübudok atema nüburtem den amaliteptsü aser ketdangsütsü atema mera balala agiba indang pai lemsatepa liasü.

Iba sentong nung Administrator, KMC, EE PWD (R&B), EE PWD (Housing), EE PWD (NH) ajanga osettsüset den nübu agüja liasü.

# NSCN/GPRN ajanga bike ka nguteta lir

**Dimapur, Yimpoksüi/Nov. 30 (TYO):** Auyar aliba bike ka (Yamaha FZ-5 chassis number MEIRG4422J0135558 aser engine number G3J3E0207225) NSCN/GPRN ajanga nguteta lir, ta NSCN/GPRN indang MIP

sangdong ka ajanga ashi. Iba bike indang tejangja kiburi phone number 8415919811 nung jembia kuli kaket tapet bener arua iba osang sangdonger anogo 7 tsüngta agizüksüla, ta sangdong ajanga ashi.

# NSCN/GPRN Tatar Hoho Winter Session ayonger

**Dimapur, Yimpoksüi/Nov. 30 (TYO):** Council Headquarters (CHq), Hebron nung December 9 aser 10, 2021 anogotem anepdang 9:00 ako nungi tenzüka Tatar Hoho Winter Session agitsü asoshi GPRN indang Yariwo-i temelaba

agütsüogi, ta NSCN/GPRN indang Tatar Hoho speaker, Arep Jamir-i sangdong ka ajanga ashi.

Iba senden nung züngsem ajunga medema arua adentsü metetdaksür, ta sangdong ajangasa ashi.

# Hornbill benjong kumdanga mungti: Dept. of H&FW

**Dimapur, Yimpoksüi/Nov. 30 (TYO):** Asenoki Hornbill Festival amungba mapang nüburtem kumzüka aser wazüka ayutsüsa mungti arung. WHO ajanga coronavirus sa sernung kanga kera aser mela menatapa aoba Omicron variant jangjatetogo. Omicron ya India nunga alitsü sudi, ta ICMR ajanga ashir aser mapang tatsüka tsüngta putettsü akok, ta Department of Health & Family Welfare, Government of Nagaland ajanga sangdong ka nung ashi.

atema vaccine agitsü kanga tongtipang lir. Research agirtemi vaccine aser danga osettem tali bushiba mapang lir.

Nüburtemi inyaksü tongtipangtibi iba virus menatsü jenjang ajema kumdaksütsü ya lir. Aser ibaji vaccine agitsü, mask inoktsü, tetsüngta ayutsüla, mopung/tango aoba lenmang ajema aliba takdang mesüra lokti tulu aliba tesemi maotsüla, teka müreka ayutsüla aser nü tekettsü nung aketsüla mesüra hajitsüla.

Omicron variant ka kanga tekera. Iba cases ya mezüng November 9 nü jangjatet aser World Health Organisation (WHO) nem November 24, 2021 nü osang agütsü.

Iba variant ya melenshir aser karbo tebilemstü keta lir. Danga Variant of Concerns (VOCs) den medemdangra, iba variant ya tanaben menatsü temelaba asütsü akok, ta bushiteta lir.

COVID-19 tendangba oset timbai iba variant ya puteter. Laboratory aika nung kanga bulua amshiba PCR test amshia tendangba nung 'target genes' asem nungi ka meputet (koba dang S gene dropout mesüra S gene target failure ta ajar). Ibai Alpha variant den mesüktepa lir. Anungji asenoki PCR test amshia variant tasenba ya kanga kera jangjatetsü aser variant tasenba jangjashitsü asoshi genome sequencing atema sample tem shima yoktetsü, ta sangdong ajanga ashi.

Alima sünga prokshia aliba variant tem nungi kumzüka alitsü

COVID-19 tali prokshiba ama virus melenshitsu maongka tali agütsür, aser yamaji virus yimya melenshir. COVID-19 tashidak menatapa aoba ajemdaksütsü atema asenok ajaki maneni inyaksü tongtipang lir, ta ashi.

Lokti, tamangba yimsü mesüra danga telok adenshidak ajaki mask agitsüla. Mask yagi iba tashidak menaba ajemdaksür aser mazüokteti menatapa aoba nungi jenbur.

Anungji benjong kumdanga mungti. COVID-19 tashidak nungi jenbua alitsüba yimyatem ajak amshiti, kimai ayazükba mapang ajak nung mask agiang, mapang shia teka shidokang mesüra hand sanitizer bener senzüang aser nisung tali alidaki maotsü merangang.

Tematiba nung iba tashidak nungi kumzüksü atema COVID-19 vaccine nungdakba doses agiang aser ajak kumzüka mali tashi shinga kumzüka mali ta ajaki metetti, ta Department of Health & Family Welfare sangdong ajanga ashi.



# Mizoram CM Zoramthanga-i PM Modi den ajurutep



Mizoram chief minister Zoramthanga-i Mongulbarnü New Delhi nung Prime Minister Narendra Modi den ajurutepdang tangokba noksa nung angur.

**Aizawl, November 30, 2021 (Agencies):** Mizoram chief minister Zoramthanga-i Mongulbarnü New Delhi nung Prime Minister Narendra Modi den ajurutep.

Iba mapa tenati Mizoram dak sendakba onüktem lemsatepa liasü.

Senden nung Mizoram CM-

i Assam den arrtsü mangatettep ken o benoka jembi.

Taoba hopta Assam CM Himanta Biswa Sarma-i Union home minister Amit Shah den ajurutepba sülen tanü Mizoram CM Zoramthanga-i Prime Minister den ajurutepogo.

Assam aser Mizoram sorkartemi arrtsü ken o tem

angatetteptsü atema ludentem tentettsü bangjemtepogo.

Taoba hopta New Delhi nung Assam chief minister Himanta Biswa Sarma aser Mizoram chief minister Zoramthanga nati iba telemetba ya agia liasü.

Iba senden nung Union home minister Amit Shah aden.

# Jorhat nung AASU tanishir tepsetba atema nisung 13 apu

**Guwahati, November 30, 2021 (Agencies):** Jorhat nung AASU tanishir ka tepsetba dak sendakba nung police-i nisung 13 puogo.

Iba tatalokba nung tongti süa tai tongloktsür Neeraj Das (Kola Lora) puogo.

Gari lendong ka atalokba nung dena liasü ta temolung melemi nisung telok kati arishi küm 28 tain Animesh Bhuyan amak. Iba tesem nung alirtemi

ashiba agi Bhuyan amakertemji mozü achirtem lir.

Neeraj Das ya oziung alema inyaker ka lir aser pa ya Mohan Das'er jabaso. Bhuyan aser nisung anati pa dak gari agi atsük ta pai tai tongloktsü.

Ajisüaka, Bhuyan dak tai tongloktsüba ya tiyazü liaasü aser gari lendong nung pa shilem kechia mali ta police-i metetdaksüogo.

Külen, Chief Minister

Himanta Biswa Sarma-ia police dang anogo 15 tsüngda iba tatalokba indang chargesheet benoktsü aser fast-track trial agitsü tetuyuba agütsüogo.

"Loktii Abhi-Neel tepsetba ken o atema metembangi aliba mapang ka nung nisung ka ano lenmang tiyongtsü nung loktii tepset. Onoki iba mapa inyaker ajak merenshitsü akhanger" ta AASU General Secretary Sankor Jyoti Baruah-i ashi.

# Mizoram Congress president atema Lalsawta shim

**Aizawl, November 30, 2021 (Agencies):** Mizoram state Congress vice president aser taoba finance minister Lalsawta-i Lal Thanhawla melenzüksü.

"Hombarnü president Lal Thanhawla menden ser senden ka amandang taküim October ita lemet agishi aser president tasen inyaksü atema Lalsawta shim" ta Congress secretary in charge of general administration department Lalthanglawra Ngurte-i ashi.

Lalsawta-i taoba mapang punguben tashi chief minister inyaker Lal Thanhawla

melenzüksü. 1973 nungi Lal Thanhawla-i state Congress president ama inyaka arur.

Senden nungsa taoba health minister aser Lal Thanhawla tenu Lal Thanzara-i party vice president inyaksü shim, ta Ngurte-isa metetdaksü.

Maneni, Congress Legislature Party (CLP) leader Zodintluanga party treasurer inyaksü tanaben shimshio, ta paisa shisem.

December 17 nü sentong ka nung Lal Thanhawla-i tanishir tasen shimba osang metetdaksütsü.

# Sanjay Dutt-i AP atema brand ambassador inyaksü

**Itanagar, November 30, 2021 (Agencies):** Arunachal Pradesh sorkari brand ambassador inyaksü atema Bollywood actor Sanjay Dutt shimogo.

Arunachal Pradesh state küm 50 ajungba hon jubilee benjung atema Sanjay den filmmaker Rahul Mittra na brand advisor inyaksü shim.

Sanjay aser Mittra na lia Chief Minister Pema Khandu aser Assembly Speaker Pasang Sona Dorjee nati iba osang ya metetdaksü.

Hombarnü Sanjay Dutt-i Mumbai nungi chartered flight ka ajanga Dibrugarh atong aser idak nung jagi helicopter ajanga Mechuka-i aru.

Iba sentong nung Rahul Mittra Films ajanga inyaba

campaign ka sayu. Iba ya ad filmmaker Shiraz Bhattacharya ajanga yangluba liasü aser Arunachal tourism alizüing yur Sanjay Dutt-i shilem agi.

Item promotional films dak alia Sanjay-isa Arunachal nung lanurtem den ajurutepa sensaksema liasü.

Iba film ji Ziro village, Pakke valley, Dambuk, Namsai, Parshuram Kund, Pasighat, Mechuka aser Tawang nung yanglu.

Ita ka piyong benjungmong ya January 20, 2022 nungi Ziro nung amongtsü. 1972 küm Arunachal Pradesh tenüing aser Union Territory jenjang ya Ziro nung anguba liasü.

February 20, 2022 nü Statehood Day nung Itanagar nung benjung tembangtsü.

# UNLF telungpur indang prangpong-injangtem ngutet

**Guwahati, November 30, 2021 (Agencies):** Manipur kübok Imphal East district nung police-i prangpong-injang aika ngutet aser iba dak sendakba nung United National Liberation Front (UNLF) telungpur ka dena nisung asem apu.

UNLF telungpurji Prafullo Singh (43) ta jangjaogo.

Osang tejangja ka angazükba nung ajemdaker Manipur police-i Huikap Awang Leikai nung mita ao.

Iba mapang AK-56 rifles 13, AK-81 ka, AK-86 rifle ka, M-16 series assault rifles ana, RPG launcher den live shell, 7.62 live ammunition 200 rounds aser 5.5 live ammunition 10 rounds ngutet, ta police ketdangsür kati

ashi. UNLF telungpur Prafullo Singh'er nashi ki tsünglanglen prangpong-injangtem miima yua liasü ta paisa ashi.

Pa den külemi apuba nisung anaji Laitonjam Kumar Sinh (47) aser Wahengbam Tompok (49) na ta jangjaogo.

Tenati Prafullo den yaritepa prangpong-injangtem miima ayu ta police-i metetdaksü.

UNLF züngsemtemi Huikap Awang Leikai nung prangpong-injangtem miima ayuba osang ka onoki angazük. Iba jagi police telok ka iba tesemi ao aser prangpong-injangtem ngutet" ta Thoubal SP Jogeschandra Haobijam-i ashi

## GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA - 797004

NO.DTE/ESTT-NP-13/2017/

Dated, Kohima the 30th November 2021

### ADDENDUM

In continuation of this office Notification of even no, dated 26th November 2021, 1 (one) post of Lecturer in Civil Engineering under the Department of Technical Education has been added. The terms and conditions, Educational Qualification and Pay matrix remain the same.

(Er. M. Nakro)  
Additional Director &HoD

# Iba Benjung Mapang, COVID - 19 masü saka tepela prokshiang

Tepela prokshiang : Virus ajanga virus mebelenshir. Nisungtemi ang virus prokshir.

Asenoki tebilemstsü bena aser COVID-19 nungi kümzüka nisungtem asoshi aria bilemstsür ta sayudi. Iba benjung mapang COVID masü tepela ola prokshiang.

Renemshiang  
Mask enoktsü kodanga  
mamatsüla.

Nai meimertem temang anema yujang.  
COVID19 vaccine agiang.

Medemer atema  
mask enokang.  
Külemi kazüang saka mask  
teti enokang. Nisung  
longsoba nung tepela tali  
lir, tebilemstsü bena  
benjungang.

Kümdanga  
Külemang  
Nai sentep-senji nung  
adendang, tangar den  
tepila yuang aser teti mask  
enokang.

ASENOK IBA NUNG KÜLEMI LIR TA BILEMTETANG. NISUNG AJAK MEKÜMZÜK TASHI SHINGA KÜMZÜKA MALI.





# TIR YIMYIM YIMOBILEM (EDITORIAL)

DIMAPUR RASEMNÜ, LUCHII(DECEMBER) 01, 2021

## Police-i nübortem yariner

**N**agaland nung senso mashi kati nungdak mapang mobile nungi police jatettsüsa tang Nagaland police-i " Call Your Cop" ( Nenok meyong Police Jaang) ta ser Mobile App ka lapoka yutsübaji, nübortem alidak kiyong shia nung police station kaka lapoktsüyonga aoba dang nungi kanga agia tajungba lir. Iba jagi nübortem alidak ozüng raksaba mapatem metetetmeteta azüoktetsü imlar. Atangji, alima nung ozüng raksar mali nungbo police mapa ya melila, tetezü police mapaji ozüng raksartem nokdangtsü aser azüoktsü asoshi lir, anungji jangratemtsü mapa kabo masü, lendong aser timtem ajurutsüba mapa ka lir. Aji oda, yimti nung police-temi nüken belem arema aser lendong timtem tizükteta amang sangwa maka anükba ajanga nübortem ayipjanga mejanger aser ki aser alu mapatem tetsübu tarendak melii sademsadema inyaker. Ajsüaka, tesasatsüka, aiben asenoki police-temi gate nung khu abenba garitem nungi sen sarua agiba aser ozüng raksartem ket nungi sübokrem agir chiokba indangang mepelaba jembir. Atangji, iba ama tezüdangtsü mapaji aiben police-temi inyakba angur aser angashir. Iba jagi police meraket samar. Aji oda, police angudang nübortem mulung anisüngzüksü melen sen meshitsüang arendaka nübortemi bilemer. Iba jagi aiben nisungtemi police ajunga tenüng menükja, police-tem nemji sen tera agütsüra ojang, odang chioktsü ta luja jembiba asenoki angashir. Atangji, police ajakibo yamaji meinyaktsü saka kari meshitak inyakba agi ajak nungkhu bentetter. Ano, khenkhenbo, police süoshi mashimashi agir, button-a matang, yi agi meseper yimdong nung senzüa angur. Iba jagi police dang masü saka state ajunga alur, kechiyong police-temji pei lima kümzüka ayur mitkartem lir, anungji inyaksangshiba ajak nung teyakyak aser süoshi süboba nunga mera taket asütsüla. Alima linüktem nung police-tem temang aser süoshi agibaren reprangdanga odangra, America nunger police-sa teyakyaba aser aküm taketba jangratemtsüka angur. Parnok temangjibo ayangayanger, melangteper mesüra tsüngteper nisungang mesük aser süoshi agiba nunga zep ta akümketa sübotetter. Parnok denji medemdanga asenoki India police-tem temang aser süoshi agiba reprangdanga, India nunger policetembo tebok chizüker tarazük majung, parnok auer ashir arishia oa aputsü asü (?) mesüra ashir-auertem jagiang parnok tanemi alena yutsür aotsü ta shisabolua bilemetsüsaba jenjang nung asenoki angur. Item India police-tem rongnungji asenoka dena lir. Ano, asenok rongnungbo, ashiko, ozüng raksartem mittsü shimba mitakertem rongnunga machimajemtsü chia ajemer alitsüa akok. Ibaji tanü Nagaland asoshi shisabolutsüka lir. Atangji, itemji tanishir aser yimsüsürtemi meteta lir, anungji asenok ajak lendongi maitsüsa police-tem rongnung pei mapa aser tangatetba nung pei tetsü tasoli meimba shisatsü alitsüsa tesayuba aser tazüokba alitsüla. Joko, senso ajak asoshi kodang police teyari nungdakdir, mashi mapang ka nung mobile phone ajanga ajatsüsa lenmang lapoktsüba jagi nübortemi police-tem dak temulung lemtettsüsa mapang tajung ka yanglutetogo. Aji oda, mashi mapang ka nung mobile phone ajanga anasatiba police station nungi teyari asüngdangtsüsa lemang lapoktetbaji, senso shia pei taküm aser kiojen anüktsü asoshi 'security guard' anguba den kasasa lir. Iba jagi asen taküm aser asen ki anüktsü. Atangji, police nungdakba mapangji mapang tajungbo masütsü, kechiyong lendong timtem mapangang police teyari nungdaktsü. Ibaji meteta nübortemi police-temia tasü itta ozüng raksartem anema inyaktettsüsa akok tashi yariteptsüla. Nübortem o police naji ka aliba agi ka alir, kechiyong nübortem anüktsü aser kümzüksü asoshi police shimer. Aji oda, nübortem aliba agiang police alir aser police aliba agiang nübortema lendong timtem nungi kümzüka alir. Iba tagitsüji kodang asenoki angatetdir, nübortemi police akümtsübuttsü aser police-temia nübortem mashioktsüi yaritsü. Tanü joko khen nung mopong ajanga tongtepratepba putu asünungji, putu den peta Nagaland police-i nübortem nungdak mapang jet ta oagi yaritettsüsa lenmang lapoktsübaji pei lima aser nübortem meima inyakba mapa ka asütsü. Iba lenmangji meteta, kodang asenok ajaki nungdak mapang " Nenok Meyong Police Jaang" ta asüba mobile app-ji amshidir, idangjibo nübortem o police na tsüngda ozüng raksartem mejenbutettsü, anungji alima nung tesünep alitsü. Iba mobile app nung asenok anasatiba aliba police station aser yangji alir police-tem ajatsüba phone number aser police tanshirtem tenüng ajak agüja lir. Ibaji nübortem nungdak nung ajatsü atema yutsüba tenüngtem lir, anungji shingaia kecha marendaki nungdak mapang nung parnokji ajatsüla. Iba mobile app lapokba ajanga tasü tait Nagaland police-temi nübortem lendong timtem nungi kümzüka osang tajung maneni angashipet angashitsü imlar.

# OLEMSABANG

## Ao Ojang "Mulung" nung semlokba

~ T. Meren Paul, Kohima

(Yashi adok nungi...)

60. Mulungmadang- tagitsü mait shishia bilemba mali, not introvert.
61. Mulungmajang- temulung züngzünger masü, not firm.
62. Mulungmajem- shisaobang, tebilemba meputep palala, conflict of opinion.
63. Mulungmaka- tatamenta tulu, taoksatsüsa ajuruba, hopedimmsers.
64. Mulungmakang- aiben temulung melenshir, tejong majet, fickle minded.
65. Mulungmalem- tatidaksü aliba, damang makatetba, suspicious.
66. Mulungmalet- tzüra matem, tebilemba ajak peria matalok, not contented.
67. Mulungmangjet- nungtoku nisung asü dang mangjak nung tetoshi asü mangyim ken tenloksüba Obituary eulogy to heroic leader.
68. Mulungmangsep- manemshilu tulu mesüra asüama ajungben lendong tulu kibongnung adalokdang teimla samaer tamang aruba, distress in time of dire situation, bereavement.
69. Mulungmangu- tebangi jembiba aser teinyakba mapa palala, kenyongi meputep aseni tangar shisatsü manguba, not perceptible.
70. Mulungmasen- temulung nung sapua magizükba, keta masen, dislike, not preferred.
71. Mulungmasü- teyimlaba dang nungi tajemba, tilaba, not satisfied.
72. **Mulungmatem \*AO-**
73. Mulungmatem- temulung agi magizüktetba, metsükmekongba, abhor.
74. Mulungmazüng- ajak amaa adoker, mebilemteter, absent minded.
75. Mulungmenen- olulu agi ain adoka temulung menendaktsüba, disgusting.
76. **Mulungmesa \*AO-**
77. Mulungmesak- tejashitsü mapa sakaain madoki aremzükba, forbearance,
78. **Mulungmeso \*AO-**
79. Mulungmemulung- mulunger asü memulunger ta asüngdangba, confirmation.
80. Mulungmulung- An-i akuba entsü tila, arenlong takah ajar, abnormal small egg.
81. Mulungmulunger- tenari, polong polonger, rounded, spherical.
82. Mulungmulunger- tarendak makai kanga mulungsoba, full hearted.
83. **Mulungnen \*AO-**
84. Mulungnenshi- bilemtettsü tanaben nenshia ashiba, gentle reminder.
85. Mulungno- nai ibai mulunga asü na? ta asüngdangba, were you willing?
86. Mulungnok- tamang katetba, mulung lemtet medemer rogo, camaraderie,
87. Mulungnüken- shisabulu khuret tulu agi temulung tip matemba, ponder.
88. Mulungnükla- asangsang nung tenük agi masü saka temulung nung anguba, imagination, day dreaming, fantasy.
89. Mulungoko- hai ta ashiba, nangzükba, mulungba, agreed.
90. Mulungpabok- angazüka meteta aliba temai adoka lemsatet, overture.
91. Mulungmapu- taginüba palala, temulung meputebi akum, discord.
92. **Mulungpela \*AO-**
93. Mulungpenbu- menüngdak sür nung temulung nung kechisarena tali tapong aginüa jangraa aitba -extravagant desire, fascination
94. Mulungpenjah- tebilemba, taginüba aika, asangsang dak nungi alia penpua, bilemba, aginüba preposterous.
95. Mulungpenzü- mulung nükla nung shisadangba, bilemba, aginüba, fantasy.
96. Mulungpepzü- temulung nung tip matem arakzüba, turmoil in heart.
97. Mulungpila- shisa obang aser mapa nung külemi putepa ka dang süa aliba mebutepi akümba pilaba, broken relation, discord.
98. Mulungpokba- temulung tila, tera nung aoksaba, tasü mait, trifle, daunted.
99. **Mulungpu \*AO-**
100. Mulungpua- temulung puaba, jaludaktsüba, taginüba adokdaksü, enchanted.
101. Mulungpungok- tajung majung meshisadangi densemba, doubtful decision.
102. Mulungpusa/pusazük- pusapulema bungtena ajazüa aoksaba, hysteria.
103. Mulungra- temulung nung agizüktetra, hai hau ta süra, if willing.
104. Mulungrah- temulung tarah, tettsüba mali, majemer, very bold hearted.
105. Mulungrabalen- yimdangi maru, osaolemer, not mindful, way ward.
106. Mulungrajem- tangari sayuba aser ajungshiba agi masü, saka pei mulung nungangateta ratetba shisatsü, own perception.
107. Mulungramah- temulung agi kecha mebilemtet akümba, dementia.
108. Mulungramok- mezüngmeshia temulung reshikangshiba, suppressed.
109. Mulungrangben- rasaralem maket, shisatsü tongmelang, simple minded.
110. Mulungranglok- tagitsü, tadongtsü, tangutsü nükla ayuba, goal setting.
111. Mulungrasa- temulung nung ain adoka jashi, indignant.
112. Mulungrishi- tangar mulung nung bilema aliba lahzükba, discern.
113. Mulungrok- temulungjang telung, tarok shingaia mangur, secretive.
114. Mulunrongjen- apuani ajungbena süadoker kija temulung rongjena, bereft.
115. Mulunrongsa- mapa tamajung inyakba angudang aria bilemba, contrite
116. Mulunrotet- tejangra tulu adok-a arameso, apuso, kindle enthusiasm.
117. Mulungsaklok- temulungagi junger ta agizükba, liking, appealing.
118. Mulungsasa- tejembinü, teti pelaa jembir, outspoken.
119. Mulungsatok- shisapulu nungi anen, temulung pungba-a akum, being relieved.
120. Mulungsala- meyimmiji mapa, ken o temai madok aliba sala, overt, disclose.
121. Mulungsangshi- tebilemba palala aika sangshia aoba, divergent view.
122. Mulungsangwa- shisabulu oadok, temulung sangwaa aküm, brighten up.
123. Mulungsem- telemtetba nung densem, mulunga aden, decided along.
124. Mulungsemer- shisa obang nung tajungshir, temedanger, counselor.
125. **Mulungsen \*AO-**
126. Mulungsenen- tsübu, tzürema ait, tasü meti aküm, scary, tense.
127. Mulungsensü- shisatsü, jakla yimya, inyaksangshi, personal demeanor.
128. Mulungsepshi- telemtetba melenshi, tenangzüktepba asepsi, rescinded.
129. Mulungshimak- tejashitsü agi adong, grief stricken.
130. Mulungshipok- temulung laboka jembir, kecha meima mayu, disclose.
131. Mulungshirang- timtem lendong, mepetmesü ajuruba ajanga temulung shimaka shisapuluba distress and pain consciously.

(Yashi adok nungi...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**



## Hindu teloki Delhi aser Karnataka nung Khristantem anema inyak



November 28, 2021 nü Karnataka nung Hassan district kübok Belur nung Bajrang Dal teloki Khristantem tekülem sentong tagidak mapang timtem agütsü. Iba tesem jagi police arua Bajrang Dal züngsemtem nokdangba noksa nung angur.

**New Delhi, November 30 (Agencies):** Tang India linük nung Hindu yimsü alia amangertemi Khristantem tekülem sentong tagidak mapang timtem agütsüba kanga bulua atalokdar; November 28 nüa Hindu telok- Bajrang Dal züngsemtemi Delhi aser Karnataka na nung Khristantem nem timtem agütsüogo.

November 28, 2021 nü linük yimtiba, Delhi nung Bajrang Dal teloki Dwarka nung tang tasen semzükba Arogo Tenla ki ka raksatsü.

Osangbener den jembidang Unity in Compassion nung general secretary, Minakshi Singh-i, "Iba Tenla ki ya Mongolbarnü (November 23) ang semzükba liasü aser tang mezüng Tenla ki tasenba nung tekülem sentong agiba mapang Hindu yimsü alia amangertemi timtem agütsü. Iba Arogo ya Jalandhar nung amenoka aliba Ankur Nirula Ministries-i tenzüksü," ta metetdaksü.

Singh-isa, "Police-ia minority tem anema inyaker. Police-i aibelener ka dang apu saka mapang tatsüka asüngdangyaba sülenbo chiok," ta metetdaksü.

Osang angazükba agi,

police-i Tenla ki raksatsürtem anema ken o ka aser Tenla kidang alirtem anema-a ken o ka benokogo. Delhi Disaster Management Act kübok parnok anema ken o benok.

Tenla ki raksatsüba video ji ka social media nung prokshio go aser video nungji Hindu nunger 25-30 shii Khristantem den raraba lir.

Ano tanga tatalokba ka nung, kasa anogo (November 28 nü) nungsa Karnataka nung Hassan district kübok Belur nung Bajrang Dal telok Khristantem tekülem sentong agiba tesemi arua Khristantem nem timtem agütsü, ajisüaka police arua tensa azüokteta liasü.

Osang angazükba agi, tekülem agiba prayer hall ji Life to the Nation's Ministries indang lir.

Karnataka nung Bharatiya Janata Party sorkari state tem ajaklen Khristantem tekülem sentong agiba mita repringdar.

October 16, 2021 nü state Intelligence Department-i

police aser intelligence ketdangsertem dang Karnataka nung temelaba agüja aliba Arogotem aser temelaba magiba Arogotem indang osang tejangja bendenang, ta

tuyua liasü.

Karnataka nung sorkari anti conversion ozüng ka benoktsü tebilemba lia sorkari Khristan missionaries anema bushisüngdangtsü tuyuogo.

Taoba ita Backward Classes & Minorities Welfare Committee senden amenba mapang nung Khristan miissionary tem anema bushisüngdangtsü atema lemtet. Iba senden nungji BJP MLA Goolihatti Shekar densema MLA aika aden.

Senden nung jembidang BJP MLA, Shekar-i Khristan missionary tem ajak registration agidaksütsüla, ta ashiba den külemi state nung Arogo shilem 40 bo unofficial aser state-i recognize masü, ta metetdaksü liasü.

Senden nungsa committee züngsemtemi Hindu yimsü toktsür Khristan yimsü dangi meyipertem nembo sorkar teyari balala magütsütsüla ta jembidi.

BJP lenirtemi ashiba agi, Karnataka nung Khristan yimsü dangi meyipba ya mazüokteti kümogo, anungji yimsü meyipba nokdangtsü atema anti conversion ozüng ka nüngdaker.

## Country kentener LeAnn Rimes-i osangtajung kensep ka sayatsü

LeAnn Rimes



**Yimpöksüi/November 30, 2021:** Grammy award angur country kentener, LeAnn Rimes-i osangtajung kensep 'God's Work' sayatsü sentong lir.

Interview ka nung jembidang Rimes-i, iba kensep nüngja ajanga alima nung asenok teinyaktsü mapa balala atema Tsüngremi asenok alimai arudaksüba lemsateper, ta ashi.

"Asenok wadang kar inyaktsü atema alimai yok saka ibaji inyaktsü mesüra meinyaktsüji asen sasa telemtetba agitsüla. Tajungshiba balaka nung iba kensep adoker," ta lai metetdaksü.

"Iba kensep kobi melii renemtsü, aser iba kensep nung keta aliba kentem nüburtem nem angadaksütsü ni

matateter," ta lai metetdaksü.

Laisa, iba kensep nung keta aliba ken kar ajanga meimchir tepor ajungba aser temeshiba indang lemsateper, ta ashi.

"Asenok ya meimchir ka ta ni amanger, aser meimchir dak tepor ajung jenti lir, iba denji külemi asenok ya temeshi. Anapronglaji asenoki agizüktet nung ang asenok tabensa akümer," ta lai ashi.

Iba kensep ya 2022 küm tetenzüklen sayatsü.

Arrshi küm 39, Rimes-i 1996 küm la indang kensep 'Blue' ajanga mezüngbuba Grammy award ngua liasü, iba mapang nungji la arrshi küm 14 dang liasü.

1997 küm nunga lai 'best new artist' Grammy award ngua liasü.

## ANO GO ABEN TSÜNGREM DEN

### Asüküm tashi ya amajok

"Ambangyim aser amajok asüküm agi kecha teinyak; saka ajemalu shisatsü agi nisung shiai pei dang nungibo pi taoba ta züngshiangma."

- Filipi 2:3

Meimchir taküm ka nung asüküm jakla agi kodang mokbangdir, temenen tera aika poktetdaksür. Tongtipang kaji shiba dak asüküm lir parnok dek ano ambangyim yimya adoker. Anungji, asenok ajak asoshi asen taküm nung kanga mita alitsübaaji iba asüküm jakla nungi ajentsü Tsüngrem nungi teti tashi meshia alitsüla. Aseni takok angudang, mesüra tila ka inyaktetdang asen dangi temenen ajanga tatidang arutsü aser ibaji asüküm temenenji lir. Asenok kodang iba asüküm nem kokdaksüdir asenji tangari kodanga junga mereprangtsü, asen den tesendaktep malitsü, asenji menetong ka akümtsü, aser asenok azükaru temoatsü kodanga malitsü. T.Mapa 12:23 nungji, Herod chubai Tsüngrem amadok, aser pa tashi, yimli nungji ajemdaker, asükümba ajanga pai pa mapang tashiyim, ambangyim aika inyak. Nütsüng nüburtem dang masü saka Tsüngrem kanga jashi. Asen Tsüngrem ain adoktsüsa asenok lira asen takümji alima nung maso tajungba. Hero taküm tembangbaji, pai repringa dang aser meteta dang pa takümji meseni rüseta asü. Temeim adianutem, Filip 2:3b nung ajungshiba ama, saka ajemalu shisatsü agi nisung shiai pei dang nungibo pi taoba ta züngshiangma". Iba tashi nung asenok ajak jajadi.

**Sarasadem**

O Kibuba, kü dak asüküm jakla lira nai intokjang, aser kü asüküm jakla agi kar danga yiruja lira tatok agüjangma. Amen

## Rev. Dr. W. Along Jamir BSI Dept of Translation nung Director shim



Rev. Dr. W. Along Jamir

**Mokokchung, November 30**

**(TYO):** Bible Society of India (BSI) kübok Department of Translation nung Rev. Dr. W. Along Jamir Director shimogo, ta osang ka ajanga metetdaksü.

Iba ya Nagaland aser Northeast India asoshi jangratemsü osang ka lir.

November 22, 2021 nü Bible Society of India tenüng nung Bible Society of India General Secretary, Rev. Dr. M. Mani Chacko-i Rev. Dr. W. Along Jamir, Department of Translation, Director aniokba mapa ketdang süa agi.

Iba anogo BSI General Secretary-i Tenüngsang Ken 91 zünga Rev. Dr. W. Along Jamir wadang tasenba asoshi temoatsü meshia sarasademtsü.

Rev. Dr. W. Along Jamir ya Laishiba meyipba mapa balala

nung takok ngua inyakba takutet nübo ka lir. Pa angazüktsü nung kanga tekara. Pa ya Translation Centre, Shillong nung Associate Director küm 9 inyak. Pa kinungtsü Nurse Lipoksenla Ozukum lir aser Tsüngremi tena nem jabaso ana - Putiyinsem Jamir (arrshi küm 17) aser Wadangtir Jamir (arrshi küm 14) moaja lir.

Dr. Along ya Mopungchuket yim nungi. Par tsürabur ya Dimapur nung alir aser pa ya Dimapur Ao Baptist Arogo (DABA) nungi lir. Joko BSI nung mapa tasen agizükba ajanga par kibong Bangalore nung alir. BSI kübok Dept. of Translations nung Director jenjang atongba ya ashiko Nagaland aser North-east India nungibo pa ya mezüngbuba asütsü, ta osang ajanga angazüker.



**OLONG PAITEP # 6013**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
								18		
19										

<b>TIPIEN</b> 2. Teburtemi tejak nung awaba - (8) 6. T _ _ _ em - (3) 8. Tzük ayudak - (3) 9. Nüngdakba dang timba - (6) 11. Züina ao - (4) 12. Yangi tzü angur - (5) 14. Tangar dang nungi tali - (4) 16. Senyong masü - (6) 17. Oadokdi - (3) 18. Tzü tarok - (3) 19. Yimtaklir aikati iba ya ki den külemi yanglusemer - (8)	<b>LANGTSÜNGLEN</b> 1. Temejangdak - (6) 3. Nisung ka mapa inyaksü nübo- (4) 4. Azüntsü asoshi mejemba - (6) 5. Tesangwa agütsüba - (5) 7. Tila masü - (4) 10. Tebenjem tetsür chanu - (4) 11. Tekolak nung inok - (4) 12. Tetsüngda - (6) 13. Tangar inyakba ka inyak - (6) 14. Tim masü ta ashi - (5) 15. Asalendong - (4) 16. Tanü dangtsü - (4)
------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------	-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------

**OLONG PAITEP # 6012 TELANGZÜBA**

<b>TIPIEN :</b> 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.	<b>LANGTSÜNGLEN :</b> 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.
-------------------------------------------------------------------------------------------------------------------------------------	---------------------------------------------------------------------------------------------------------------------------------------------



**2021 NOVEMBER ITA LILI RESULT !**

November ita nung Lili tajungtiba (First) shimteta tanü yangi lephsia agütsür. Lili zülur-i December 10, 2021 tashi nung Tir Yimyim Office nungi senpet agizütsü mepishia metetdaksür.

Künü anogo asangur ka, tola ajak nungji lipstick sünga nüshir, yi agi jemkanger, yi pongdang ka longpant pocket nungi juteta adoka semer bus ka nung mener newspaper ka züngyaa alidang tambur ka atua amen aser tena sensaksemer.

- Yijemsang** : Uncle, ni langka asüngdangdini?
- Tambur** : Asüngdangma.
- Yijemsang** : Ya Arthritis ta asüba ya komala tashidak ka ar na?
- Tambur** : Iba tashidak ya tenüktelen, teloktep ya waka kangshir ati, nenok amala yi jema, tetsür den mashii seplepsepar dak bulua atongerako. Na iba jaji kangshirana?
- Yijemsang** : Masüako, masüako. Asenok Pastorba iba tashidak yagi atonga ta osang kaküt nungya lirja!

Lilir : WhatsApp

**TANÜBO NAI LANGZÜANG**

Q. Linük kobai 'Future Soldier' asalentong saya?  
[A] USA [B] UK [C] Australia [D] France  
\_\_\_\_\_ (Taruba adok nung onoki langzüsü)  
YASHI ADOK TELANGZÜBA : NFT

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Libajen**  
(n) nisungtem alidak tzü mopong aser libaliru yimyatem (environment)  
\* Nagaland **libajen** ya ajak kanga junger.

**Libaliyim**  
(adv) libaliru yimyatem ( way of life)  
\* Lokti ajungtsü atema inyaksüba asenok **libaliyim** lir.

**NAI-A YA METETTER MA**

**DECEMBER 2021' ITA TONGTIBANG ANOGO KAR:**

- 1 December : World AIDS Day
- 2 December : National Pollution Control Day  
International Day for the Abolition of Slavery
- 3 December : World Day of the Handicapped
- 4 December : Indian Navy Day
- 5 December : International Volunteer Day  
World Soil Day
- 7 December : Armed Forces Flag Day  
International Civil Aviation Day
- 9 December : International Anti-Corruption Day
- 10 December : Human Rights Day
- 11 December : International Mountain Day  
UNICEF Day
- 14 December : National Energy Conservation Day
- 16 December : Vijay Diwas
- 18 December : Minorities Rights Day in India  
International Migrants Day
- 19 December : Goa's Liberation Day
- 20 December : International Human Solidarity Day
- 22 December : National Mathematics Day
- 23 December : Kisan Diwas
- 24 December : National Consumer Rights Day
- 25 December : Christmas Day  
Good Governance Day (India)
- 31 December : New Year's Eve

**SUDOKU # 6054 TELANGZÜBA # 6053**

	9	7	3		6	4	1	8	7	9	3	8	2	1	4	5	6
		2		5		3	9	6	8	5	4	9	7	6	2	1	3
3			9		4				2	6	1	5	3	4	9	8	7
			5			6	4		3	8	6	7	4	9	5	2	1
6			7	3	8	5	2		4	1	5	6	8	2	3	7	9
8	5	1		4					9	2	7	1	5	3	6	4	8
9	7					4	3		1	4	2	3	6	8	7	9	5
	3	4			1				6	7	8	4	9	5	1	3	2
1				9		7	8	2	5	3	9	2	1	7	8	6	4

**OJANG LUTEP # 5610**

- KÜTAM :
- NGNU :
- LAPEA :
- NÜLIRA :
- JIDONÜKNG :
- NGNU :
- GLOKRANER :
- KAINYA :
- TSAOÜ :
- MEGANRANG :

**OJANG LUTEP TELANGZÜBA # 5599**

KECHA ASHI MAJUNG AIN ADOKA JASHIBA NISUNG DEN JEMBITSÜ TASAK

**TAN HOPTA ATEMA - KOMA SÜLA ?**

Q. Kohima nung Hornbill benjong amongtsü atema Kisama yim akümba ama, Mokokchung district nunga yim ajunga adenshia sobaliba benjong amongdak yim tasen ka mesemtet nunga koma süla ?



# Mapa nungi anentsür aliba Rajya Sabha MP temi longkak aittsü



Rajya Sabha MP temi Winter Session atema Parliament House nungi parnok suspend sütsüba anema New Delhi nung longkak aitba noksa nung angur.

**New Delhi, Yimpoksü/ November 30 (Agencies):** Opposition party nungi members of Parliament 12, shirnok Hombarnü winter session atema Rajya Sabha nungi suspend sütsüogo, parnoki Bodhbarnü nungi tenzüka Mahatma Gandhi kerak yanglu jakdang longkak aittsü.

Iba telemetba ya opposition, Congress lenir Mallikarjun Kharge indang chamber nung senden ka amenba mapang telemetba agia liasü, ta iba senden nung adenba lenirtemi ashi.

Mongolbarnü house senden tenzüka sülen Kharge-i, Rajya Sabha Chairman dang winter session atema MP 12 suspend süja aliba agintsü temepeshiba ka agütsü.

"MP 12 suspend süja aliba agintsütsü ni mepeshir," ta pai ashi.

Kharge-i, pa nem ojembitsü atema temelega magütsü, koba inyakim nung aibelen lir, ta ashi. Paisa, suspension order magütsü tsüingda züngsemtem tenüing teta ashitsü nungdaker, ta ashi.

Ajisüka suspension agintsü atema mepeshiba Naidu-i magizük. Parliament monsoon session agiba mapang mesüingjemeti yimya yimpong tamajung beshiba atema MP 12 ya suspend süja liasü. Suspend sütsürtem rongnung Congress nungi trok aser Trinamool Congress (TMC) aser Shiv Sena nungi anana aser CPM aser CPI nungi kaka densema lir.

Iba sülen opposition lenirtemi Parliament kübok Mahatma Gandhi kerak yanglu anasa longkak aita laisü.

"Rajya Sabha MP 12 suspend sütsüba atema onoki

Lok Sabha nung shilem magi," ta Congress general secretary KC Venugopal-i ANI dang ashi.

Kasa mapang nung Congress lenir Rahul Gandhi-i ashiba agi, MP temi tatok memeshitsü kechiyong parnok Parliament nung nüburttem tebilemsü metetdaksürba liasü.

"Kechiba tatok meshitsü? Parliament nung nüburttem ken o benokba atema? Kechi südir süka memeshitsü," ta Gandhi-i tweet asü.

Suspend sütsür aliba MP tem rongnung Congress nungi Elamaram Kareem (CPM), Phulo Devi Netam, Chhaya Verma, R Bora, Rajamani Patel, Syed Nasir Hussain aser Akhilesh Prasad Singh; CPI nungi Binoy Viswam; Trinamool Congress nungi Dola Sen aser Shanta Chhetri, Shiv Sena nungi Priyanka Chaturvedi aser Anil Desai nung densema lir.

# Pensioner tem atema sorkari 'unique' face recognition tech tenzüker

**New Delhi, Yimpoksü/ November 30 (Agencies):** Minister of State for Personnel, Jitendra Singh-i pensioner tem atema "unique" face recognition technology tenzüksüogo; iba ya pensioner tem 'life certificate' kuli atema amshitsü.

Pension maneni agitsü atema küm shia pensioner temi 'life certificate' agütsütsü. Ministry of Personnel, Public Grievances & Pensions-i digital ajanga life certificate agütsütsü

atema facility tenzüko, ta pai metetdaksü.

"Pensioner tem nungdak reprangtetba sülen parnok libaliro temelaba kümdaktsütsü atema Centre sorkari inyaker. 2014 küm sorkar tasen akümba sülen sorkari pensioner tem atema digital life certificate tenzüksü telemetba agia liasü. Unique face recognition technology ya ajanga maneni pensioner tem yaritsü," ta Minister Singh-i metetdaksü.

'Face recognition technique' ajanga life certificate agütsüba ajanga Central sorkar pensioner lakh 68 dang masü saka EPFO aser state sorkartem kanga yaritsü, ta Ministry of Personnel, Public Grievances & Pensions-i metetdaksü.

Iba technology yanglutsüba atema Singh-i Ministry of Electronics & Information Technology aser UIDAI (Unique Identification Authority of India) dang pelaba lemsatepogo.



Lucknow, Nov 30: Lucknow nung Mongolbarnü Eco Garden nung Old Pension asüngsashitsü atema rally ka ayongzüka agiba mapang primary shikshak sangh nungi züngsemtemi shilem agiba noksa nung angur.

# Centre-i Dec. 31 tashi Covid-19 guidelines atsülangtsü

**New Delhi, Yimpoksü/ November 30 (Agencies):** Union home ministry-i Mongolbarnü tang benoka aliba Covid-19 guideline tem December 31 tashi atsülangtsüogo. Omicron variant poktetba sülen iba jenjang agiogo, koba alima ajunga nung ka kara prokshia odar.

Tetuyuba nung home minister-i, state sorkartem dang ministry of health-i November 25 nü tetuyuba ajang ajanga benoka inyaktsü metetdaksüogo.

"Bendanglen senzürtem den sendaktepa alirtem kanga junga meita atatsüla aser MoHFW guideline tem dak ajemdaker parnok dak tashidak tendangtsü aser bendanglen senzür shirnok dak tashidak potetogo parnok indang sample tem Indian SARS-CoV-2 Genomics Consortium (INSACOG) Guidance Document dak ajemdaker INSACOG Genome Sequencing Laboratories (IGSLs)-i yoktsüla," ta tetuyuba nung shia lir.

Maneni home ministry-isa, genomic analysis indang result takaratiba nung angutsü atema state surveillance officer temi parnok nem lemezükja aliba

IGSL tem den tesendaktep tajung ayutsüla aser INSACOG network-i iba tashidak tapu tasenba potetba indang osang agütsüra state o UT temi nüburttem health dak sendakba nung tenüingdakba maparentem ilonga benoka inyaktsü nungdaker, ta ashi

Union Health Secretary Rajesh Bhushan-i tanü states aser UT tem den lepareprangshiba senden ka ayongzüka menogo aser parnok dang tashidak memeno dang poteta azüoktsü atema tashidak tali tendangtsü tetuyuba agütsüogo.

B.1.1.529 Covid variant mesera Omicron ya mezüing taoba hopta South Africa nung potet aser World Health Organisation-i iba variant dak lendong keta lir ta shiogo.

Centre-i Deobarnü lendong keta aliba linük süier aser semdangertem atema tetuyuba tesashi agütsüogo aser state o UT tem nem tashidak tendangba jenjang aser health facility ajungkettsü atema tetuyuba agütsüogo.

Parnokisa international tayimtsütem senzusenpongtsü atema telemetba agiba asadangshitsü lemtetogo.



New Delhi, Nov 30 : New Delhi nung Mongolbarnü Azadi Ka Digital Mahotsav sentong nung Director General, National Informatics Centre (NIC), MeitY, Dr Neeta Verma-i o jembiba mapang tangokba noksa nung angur.

# Admiral R Hari Kumar India navy tekolakba kümogo

**New Delhi, Yimpoksü/ November 30 (Agencies):** Admiral R Hari Kumar, Mongolbarnü 25buba Indian Navy tekolakba kümogo. Pai Admiral Karambir Singh melenogo, shiba military mapa nungi küm 41 tenzüka sülen mapa nungi anenogo. Iba mapa magizük tsüingda Kumar ya Mumbai nung amendaker aliba Western Naval Command tekolakba liasü.

Ketdangsur ya gunnery specialist ka lir aser pa navy nung 1983 küm January ita aden.

Navy nung raraba tashi ajungkettsü atema aircraft carrier, warships, submarines aser modern helicopter tem bendenloka aoba mapang ka nung Kumar-i iba mapa agizükogo. Kasa mapang nung Indian Ocean Region nung China indang navy jenjang ajungkettsü merangba mapang temelenshi adokyonga aodang pai iba mapa agizükogo.

"Indian Navy indang 25buba chief of naval staff mapa agizükba ya kü atema tetushi ulura. Navy-i national maritime tejangraba aser maritime security dak sendakba nung tetsükdaktsütem dak rangloker inyaker. Iba atema onoki tashi ajak amshitsü. Ni masüding taoba lenirtemi nükla tajung yur navy len aniogo aser kasa lenmang nung ni len anitsü aser parnoki ajangzükter aliba dak ajemdaker inyaktsü," ta Kumar-i ashi.

Kumar-i küm 38 tsüingda aircraft carrier INS Viraat (joko mamshir), INS Ranvir, INS Nishank aser INS Kora nung amala raradang amshiba rongtem command süogo. Pai Naval War College, US, Army War College, Mhow aser Royal College of Defence Studies, UK nung course balala agiogo.

(Maneni tapak 9 nung...)





La Palma, Spain kübok Canary asetkong nung volcano maneni pokteta adokba ajanga lava yimzüka aluba anasa Spain sepaitem nokdaka aliba noksa nung angur. La Palma nung lava agi ki 2,500 dak tema raksatsüogo.

### Greece nung arishi küm 60 temapur nem vaccine agütsütsü: PM

**Athens, Yimpoksüi/ November 30 (Agencies):** Greece-i Mongolbarnü ashiba agi, parnoki arishi küm 60 aser temapurtem COVID-19 vaccine agitsü atema mandatory kümdaktsütsü. Linük nung coronavirus tashidak asendenshir poktetba mapang tang iba jenjang agiogo. Ketdangsurtemi ashiba agi, arishi küm 60 aser temapur shirnok vaccine magi lir, parnok dang senchi euro 100 achitsü. Iba inyakym ya January 16 nü nungi tenzüka itashia benoka inyaktsü. Greece nung

nütsünyongsük million 11 nungi shilem 63 nembo vaccine dose anaprongla agütsüogo. Hopta ishika tsüingda vaccine agitsü atema nüburtem aika tejakdangi arudar. "Külem lisopurtem kümzüka toktsütsü atema onok rangloker inyakdar aser ibayongji parnok vaccine agitsüji tang nungi tenzüka mandatory kümdaktsütsü," ta Greek Ato Kilonser Kyriakos Mitsotakis-i cabinet senden nung ashi. "Greek nunger arishi küm 60 aser temapurtem shirnok vaccine magi lir, parnoki January 16 nü tashi nungbo

vaccine mezüngbuba dose agitsü atema mekazüka ayutsüla, ajita mesera ketdangsurtemi ita shia euro 100 senchi achitsü," ta PM-i ashi. Greece nung iba ita tashidak nisung aika dak menadar aser anogoshi nisung timba timba dak tashidak potetdar. Taoba küm wara poktetba sülen tang tashi nung nisung 931,183 dak tashidak potetogo aser nisung 18,067 süogo. Linük nung iba ita vaccine magi alirtem dak tashidak meketaka restaurants, cinemas, museums aser gym amala tesemtem semdangtsü memelatsü telemtetba agiogo.

### Suu Kyi indang ken o angadangtsü anogo atsülangtsü

**Mandalay, Yimpoksüi/ November 30 (Agencies):** Myanmar junta court kati Mongolbarnü civilian lenir Aung San Suu Kyi anema benoka aliba ken o angadangtsü atema anogo atsülangtsüogo, ta source kati AFP dang ashi. Military anema inyaktsü ajungmesoba atema aitsür aliba ken o ya obendangtsü liasü saka iba okadak ajanga December 6 tashi mapang atsülangtsüogo, ta source-isa ashi. Arishi küm 76 tain Suu Kyi ya February ita 1 nü military-i sorkar atsüingba nü nungi sota yua lir. Nobel prize ngur alila ya military anema inyaktsü ajongmesoba ken o nung aibelena aliba ngutetra

tepuokdak küm asem ayutsü. Iba den bendenloksema la anema ken o balala benoker aliba nung aibelena aliba ngutetra la tepuokdak küm aika ayutsü. Linük yimtiba Naypyidaw nung military-i amenokba special court nung ken o angadanga mapang osangbenertem marudaktsür aser Suu Kyi indang okatsüra osangbenertem den sensak masemtsü atema tawa tenokdanga agütsüogo. Hopta ishika tsüingda Suu Kyi-i aniba National League for Democracy nungi tanga lenirtem anema ken o benoker alibatem obendangogo aser junta-i temerenshi tesashi agütsüogo.

Taoba mapang chief minister ka iba ita tetenzüklen küm 75 tepuokdak ayutsü obendang agütsüogo aser Suu Kyi nem teyari agütsür ka küm 20 tepuokdak ayutsü obendang agütsüogo. Military-i sorkar atsünga Myanmar nung mepetmesü tulu adokba sülen nisung 1,200 dak tema tepsetogo aser nisung 10,000 dak tema puogo, ta local monitoring group kati ashi.

### Barbados linük republic kumogo aser chubatsür den pilar

**Bridgetown, Yimpoksüi/ Nov. 30 (Agencies):** Barbados ya alima nung republic tasenba kumogo aser linük nung tekolakba menden nungi Queen Elizabeth II agienogo. Iba linük yimtiba, Bridgetown nung aonung sangwa sentong agiba mapang Dame Sandra Mason ya tir ka ama tezüingzüktep agi. Iba sentong nung Prince of Wales aser Barbadian kentener Rihanna aden, koba linük nüjiso

ngur küm 55 ajungba anogo denjia liasü. Prince Charles-i iba sentong nung jembiba mapang Caribbean asetkong nung alar tem tesüingmangtsüka mejungi amshiba indang ashi. Barbados atema putu tasen ka tenzüka Britain-i küm noklang aika anishia aruba tatem kati arur aser iba mapang küm 200 dak tema iba asetkong ya alar ayokba aser aliba tesem tongti ka am alia aruogo. (Maneni tapak 9 nung...)

## China-i Africa nem COVID-19 Vaccine Million 600 agütsütsü

**Beijing, Yimpoksüi/ November 30 (Agencies):** China-i Africa nem COVID-19 vaccine dose million 600 tenla agütsütsü nangzükogo. Takara aser sensaker linük tsüingda vaccine lemshiba nung tebandang aliba mapa ka nung China-i iba telemtetba agiogo. Hombarnü China-Africa forum on economic cooperation lapokba sentong nung China tir Xi Jinping-i iba tenangzükba agüja liasü. Pai, China-i ajak senteper vaccine dose billion 1 agütsütsü

ta ashi. Tanungba dose million 400 ya Africa nung amenoker aliba China nunger company tem ajanga agütsütsü ta ashi. Asenoki nisung takümüji mezüing südaktsütsüla aser vaccine agütsüba inyakym nung tebandang aliba bentettsü atema Africa nung vaccine tem tozüktüsü aser peria agütsütsü nüngdaker, ta pai ashi. Forum on China-Africa Cooperation ya küm asem nung khen alir aser taküm iba sentong ya Senegal-i ayongzükba agidar.

### Sweden PM atema Andersson tanaben shimshiogo

**Stockholm, Yimpoksüi/Nov. 30 (Agencies):** Sweden nung ato kilonser tetsür mezüngbuba, Magdalena Andersson ya linük sorkar nung tekolakba ama tanaben shimogo, shiba taoba hopta iba mapa ya agizüker ghonda ishika lir anena liasü. Yimten yimsüsürtemi Hombarnüa la ter agi ang shimteta liasü. Lai party ka kisüing agi akumba minority government ka tentettsü aser lar cabinet ya Mongolbarnü tashinung shimtsü imlar. Taoba hopta Greens temi lar par den loktepba coalition yutsüba ajanga ato kilonser ka ama ghonda tenet lir menden nungi alua liasü. Parliament nung lar teloki benokba budget melena opposition temi benokba budget ang agizük aser iba sülen lai ato kilonser menden ya yutsü. "Minority government ajunga ama asenoki parliament nung danga party tem teyari bushitsü, aser ni maongka tajung angur," ta Andersson-i Hombarnü osangbener senden ka nung ashi. Menden 349 aliba parliament nung lar teloki menden 100 mükabanga lir. "Parliament nung Social

Democrats telok nungi timba lir. Asenoki akhi mapang nungi dangar den amalitepa aruba yimsü lir aser Sweden tejakleni anitsü asoshi kechi inyaktsü nüngdak, aji inyaktsü renema alitsü." Right-wing opposition Moderate Party lenir Ulf Kristersson-i administration tasenba ya ita tuko atema caretaker government ka lir aser 2022 küm September agitsü aliba election nung parnok takok anga tulubo mongutettsü, ta ashi. Andersson-i Sweden nung tashi maittiba sorkar ka anitsü aser opposition telok asemi yangluba budget nung ajemdaker yimsü asütsü lir. Taoba hopta opposition temi benokba budget amendment tem parliament ajanga agizüka liasü, koba ajanga sorkari senotsü indoktsü sentong yangluba kanga sashia melenshitsür. Tetsür-tebur telemsa mali maparen balala inyakba ren nung Sweden ya Europe nungbo linük timba jakdang lir ta züingshia aru, saka Andersson jakdang tetsür shinga iba menden tematiba nung mena meliasü.



Chiyongtsü nung jenjang temlokba mechi Lebanon yimtiba, Beirut nung aliba international airport tsütsüi aolen lenmang mokdanga longkak aitertemi tyre rongka aliba jakdang totzü ainba noksa nung angur.



## Mopungchuket Theological Fellowship (MTF) TENÜNGSANG AGÜTSÜR



Sd/-  
Lender Jamir  
President

Mopungchuket Theological Fellowship ajanga Wb. Rev. Dr. W. Along Jamir, Wb. Watitoba aser Wt. Pangerkümla Aonok (Changki), tena jabaso, pai Director (Translation) Bible Society of India (BSI) Bangalore, jenjang ngutetba asoshi, MTF-i pelar aser tenüngsang agütsür. Tsüngremi pa wadang nung tali takok agüjang ta onok sarasadem.

Sd/-  
Tzuti  
Secretary

## Mulungnen O



Onoki teti meima aliba asür **J. Nungsang Ozukum** (Waromung), pa mapang tatsüka shirangdang aser November 27, 2021 nü iba akümüli toktsür orr onok mangyim jashi nung alidang, kwinakati ozü dang temeim sayuogo nenok ajak dang ozüi pelaba lemsateper. Ozü asükhu mapang kwinakati Sarasadem, Nübu aser Rongsen agi nungitta yariogo, nenok ajak dang kangasa pelaba shisemer. Nenok mapa tajung asoshi Tsüngremi moajangma ta ozüi sarasademtsür.

**Temeim Kinungsü, Chirnurtem,  
Anük-Apangtem aser Semchirtem.**

## Yimpang aser Alikhum nung vaccination drive ayongzük

**Bhandari, Yimpoksüi/ November 30, 2021 (TYO):** 'Block Task Force on Covid-19 Bhandari' aser 'Village Level Task Force on Covid-19' (Yimpang aser Alikhum) longjemer, Deobarnü (28.11.2021) Yimpang aser Alikhum yimtsüng nung awareness campaign aser Covid-19 vaccination drive ayongzüküka liasü, ta sangdong ajanga metetdaksü.

Bhandari kübok item yimtsüngtem nung temsüa alirtem nem vaccine agütsütsü nükjidong nung, "Har Ghar Dastak Campaign" kübok 1st aser 2nd dose ayimjema agütsüba maparen karadaksütsü atema District Task Force, Wokha tetuyuba nung anidaka iba campaign den vaccination drive ayongzük.

Assistant Public Relations Officer Bhandari, Lily Ngullie, Information Assistant, Kanili Chishi aser Ashas ajanga 'door to door awareness campaign' achaayanga liasü. Iba sülen Dr.Chonbenthung Ezung MO, PHC, Yimpang, Pharmasist Nzanthung Yanthan aser nursing staff Yimpang, PHC temi anir medical team kati 1st aser 2nd dose indang vaccination drive ketdangüsü agi.

Iba drive aser awareness campaign agiba mapang, Village level task force (VLTF) on Covid-19, Village Council Chairman aser VDB Secretary, Students' Union lennirtem, Arogo lennirtem aser Anganwadi workers temi yariogo, ta kasa sangdong ajanga metetdaksü.

## Admiral R Hari Kumar India... (Tapak 7 nungi...)

Taoba mapang pai integrated defence staff to the chairman, chiefs of staff committee tekolak mapa benogo. Iba mapang pa military indang resource tem takok tashi amshitsü atema theaterisation drive nung sendaka aruogo. Navy-i, telongjem atema inyaksü, ta pai Mongolbarnü ashi.

Chief of defence staff (CDS) General Bipin Rawat tekolak ser department of military affairs (DMA)-i, tarutsü rara aser inyakyimtem atema bushisüngdanga aliba aliba takaratiba nung inyakyonga aotsü atema services asem nem tetuyuba agütsür aliba mapang ka nung Kumar-i navy tekolakba mapa agizükogo. Iba

bushitsüngdang ya ita trok tsüngda agütsütsü tuyuogo.

2022 küm April ita tashi nung bushisüngdangtem benoktsü atema tetuyuba agütsüba ya theaterisation atema arok inyakyim ka latetsü atema lir. Bushisüngdang osang agütsütsü atema tatembangbuba itaji September liasü saka April kümtsüogo.

Tang benoka aliba theaterisation model ya operation balala nung külemi inyaksü atema integrated command tasen pezü; land-centric theatres ana, air defence theatre command ka amenoktsü atema lir. Theatre command tem amenoktsü atema küm ana shi agütsü.

## Eastern Nagaland contestant pezüi 'Miss Nagaland' nung shilem magütsü



Kohima, Yimpoksüi/November 30, 2021: Hotel Crescent nung press conference ka agiba mapang BASN ketdangsurtem külemi tangokba noksa yangi angur.

**Kohima, Yimpoksüi/ November 30, 2021 (TYO):** Miss Nagaland 2021 indang contestant 16 nungi par pezüi iba beauty pageant tetoktepba nung shilem magütsü lemtet, ta Mongolbarnü sangdong ka ajanga iba pageant tayonger Beauty and Aesthetic Society of Nagaland (BASN)-i metetdaksü.

Hotel Crescent nung press conference ka agiba mapang, BASN president Melephoto Pucho aser tanga ketdangsurtemi, Eastern Nagaland Women Organisation (ENWO) indang 2018 bangzüng ajanga Eastern Nagaland area pezü - Mon, Tuensang, Longleng aser Kiphire district nungi contestant pezü tashi iba beauty pageant nungi tukuogo, ta metetdaksü.

29buba Miss Nagaland sentong ya December 10, 2021 aonung 5:30 ako meta Hornbill Festival shilem ama RCEMPA Jotsoma nung ayongzüktsü terenemba lir.

Contestant pezüprongla audition nung shilem agiogo aser iba beauty pageant final round atema par pezüprongla den Dimapur, Kohima, Mokochung, Peren, Phek aser Zunheboto District nungi contestant 12 agi shilem agütsü renemer liasü, ta pai ashi.

Ajisüaka, tesasatsüka,

November 25, 2021 nü contestant pezü yagi iba tetoktepba nung shilem magütsü ta osang agütsü, ta Pucho-i ashi.

2018 küm ENWO-i bangzüng ka renemba, kong Miss Nagaland Beauty Pageant nung shilem magütsü (Eastern Nagaland nungi) saka Eastern Nagaland indang beauty pageant ka agütsü ta renemer aliba ajanga, iba nung anidaka par pezüprongla aruya aliba beauty pageant nungi tukadok, ta pai ashi.

Kasa küm (2018) Eastern Nagaland nungi ketdangsurtemi BASN dang Miss Nagaland tetoktepba nung iba tesem (Eastern Nagaland) nungi tetsürtemi shilem magütsü ta osang agütsü aser iba pageant (Miss Nagaland) tayonger dang iba tesem nungi shinga (kongru/ tetokteper) indang 'entry' magizüktsü asoshi mepishia liasü, ta pai yimdangi aruba lemsateper.

Pucho-i, iba beauty pageant, koba State nung nungtugu sentong ka lir, iba sentong nung Eastern Nagaland tesem nungi contestant shilem magidaksütsü asoshi ENWO telemtetba angashia BASN kanga aoksa liasü, ta ashi.

Tenangzüktep agiba ama (agreement), audition round agir sülen, iba contest nungi

tukadoker tem dang mera tapet agia tasüngdanga/merenshitsü (action) asoshi renema lir aser iba mera agütsü asoshi BASN dak tashi lir, ajisüaka beauty pageant tayongertemi par pezü dang tai adoktsü/temerenshi magütsütsü lemtet, ta pai ashi.

Contestant pezü yagi ENWO indang bangzüng memeteti liasü, ta paisa ashi.

Parnok (contestant pezü) dak sempet tajung aliba asadangteta, iba beauty pageant nung par pezüprongla shilem agidaksütsü asoshi BASN-i ano ENWO dang tatembuba mepishidangtsü, ta Pucho-i ashi.

Ajisüaka, onoki mepiba ENWO-i magizükra, BASN-i tanungba contestant 12 den iba pageant ayongzüktsü, ta pai shisem.

Maneni, iba press conference nung, Pucho-isa, iba sentong reprangtsü atema Symphony Café nung sen 500 aser sen 1000 agi ticket angütsü. Ano, beauty pageant agiba anogo, sentong ayongba tesem nunga ticket angütsü, ta metetdaksü.

Miss Nagaland 2021 nung takok angur kongru nem senpet lakh 1 den gift hampers, Brand Ambassador of TaFMA aser State Icon of Election Department agütsütsü renema lir. Iba den külemi Miss Northeast 2022 nung shilem agütsü asoshi direct entry angütsü.

Kasa tetoktepba nung runner up nem senpet 70,000, gift hampers aser District Icon of Election Department agütsütsü. Iba den külemi Miss Northeast 2022 nunga la nem direct entry agütsütsü. Tanabuba runner up nem senpet 50,000 den gift hampers agütsütsü. Tanga sub-title takok angurtem nem senpet aser gift hampers agütsütsü, ta Pucho-i ashi.

## Barbados linük republic kumogo...

Yimsüsüba tashi melenba temaitsü British yimli nem tatembangba akum agütsü aser Royal Standard nisan agizüküka melenba liasü.

Iba sentong nung tetushi tesemdang ka ama jembiba mapang, constitutional status melenshia linük ana tsüngta tesendaktep maneni alitsü, ta Prince Charles-i ashi.

Pai iba mapang ya tasen tenzükba lir ta ashi aser iba sülen tir tasenbai konang tulu aliba Order of Freedom of Barbados sempet agüja liasü.

Queen Elizabeth-ia iba linük nung tepela, tesunep aser yimchiyimjung lidakjang ta moatsü aser la molung nung teti alitsü, ta ashi.

Arishi küm 72 tain Dame Sandra Mason ya 2018 küm nung iba asetkong indang governor-general inyaka aru aser taoba ita parliament nung vote ka agitepba mapang tir inyaksü shimteta liasü. Tangbo la ya head of state ka ama

Queen melener.

"Republic Barbados rong tzüyim nung mezüng apusor. Lai tzüsem yipru ajak ajangeta asen linük aser nüburtem asen jakdang aliba tzükum nung anendakjangma," ta lai tezüngzüktep agiba sülen ashi.

Barbados ya republic akumtsü sentong taoba küm sangdonga liasü, saka Commonwealth telungzük nungsa alitsü.

Taoba mapang British Commonwealth ta nungja agüja aliba Commonwealth of Nations ya taoba mapang British yimli kübok aliba aser tang par dak metaloker aliba linüktem den ano linük karbo Britain den akhi mapang nungi tesendaktep kecha maliba linüktem lir.

Ghonda aika agiba sentong nung Ato Kilonser Mia Mottley densema lenir aikati tir tasenba matsüngdang Barbados asoshi inyaksü nangzüküka liasü. Lai kentener Rihanna nem Tir Mason-i 'national hero'

(Tapak 8 nungi...)

nungja jaloktsütsü, ta ashi. Kentener aser shishilempar tenüng chichiba ya Robyn Rihanna Fenty alitsü aser 2018 küm lar linüki la ya ambassador shima liasü.

Mottley-i Rihanna indang ken ka athishia "Na maneni diamond ama perangshiang aser nü linük dangi konang bener arujangma," ta ashi.

Iba asetkong ya England indang alartem aliba colony mezüngpur liasü. English nungertemi iba asetkong ya 1627 küm amokbang aser British yimsüsüba kübok Africa nungi bener aruba alartem amshia sugar plantation economy akum.

Barbados nung alar amshiba 1834 küm agien aser 1966 küm nüjiso angu.

Barbados nungya nütsüng yongsük 285,000 shi lir aser Caribbean asetkong tem rongnung Barbados ya nütsüng timtiba aliba aser yimchiyimjung aliba asetkong ka lir.



## Fun Tree Crew-i 3buba Darts Masters 2021 (India Open) ayongzüksü



Kohima, Yimpoksüi/November 30, 2021: Press conference ka nung Fun Tree Crew indang ketdangsürtem tangokba noksa nung angur.

**Kohima, Yimpoksüi/November 30, 2021 (TYO):** Fun Tree Crew (FTC)-i December 11, 2021 nü The Heritage, Old DC Bungalow, Kohima nung 3buba Darts Masters 2021 (India Open) ayongzüksü terenemba lir, ta sangdong ajanga metetdaksü. Mongolbarnü, press conference ka nung iba osang metetdaksüba mapang, FTC ketdangsürtemi, Covid-19 tetuyuba/SOPs ajak nung anidaka iba asayamung ayongzüksü, ta ashi. FTC event director, Theja

Kire-i, 3buba Darts Masters 2021 asayamung atema senpet ajak senteper lakh 1 agütsüsi terenemba lir. Takok angur nem senpet 30,000; runner up nem senpet 20,000 agütsüsü. Ano, 'Joint third place' nung takok angur shia nem senpet 4000 (4000 each) agütsüsü. "Most 180s, Best Checkout, Best Leg aer Most Promising Player" atema senpet 4000 (4000 each) agütsüsü renema lir. FTC general secretary Oto Angami-i, iba game indang mode - 501 asütsü. Kasa

mapang preliminary round tem 'best of 5 legs' asaya shia nung league basis asayatsü. Temaba match 8 tashi knock out basis nung best of 7 legs tokteptsü. Semi final aser final match tem best of 9 legs nung tokteptsü. Iba asayamung nung shilem agütsü asoshi December 5, 2021 tashi nungbo register asütsüla aser asayamung dak sendakba nung osang tejangja metettsü atema ph.no. 9862335647/9774408164 nung tongtepratepang, ta kasa sangdong nung shia lir.

## Kohima Hornbills-i 'Winter Super Six Cricket' kokogo



**Kohima, Yimpoksüi/November 30, 2021 (TYO):** Kohima Tanabuba innings Hornbills-i 1buba nung Enemies of the Winter Super Six Ball captain Deeto-i Cricket asayamung kanga meranga asaya kokogo. Mongolbarnü, saka team-i run 76 dang Midnight Blue Club yangluteta Hornbills Kohima ajanga High puri iba asaya koktet. School ground, Kohima 1buba Winter Super nung iba cricket Six Cricket asayamung asayamung ayongzüksü nung Enemies of the Iiasü, ta sangdong Ball nungi Veri Tetseo-ajanga metetdaksü. i 'man of the Iba asayamung final tournament' award nung Kohima Hornbills angu. Iba cricket aser Enemies of the asayamung nung team Ball na tsüngda asaya 12 agi shilem agiogo, ta Iiasü, kong Hornbills-i kasa sangdong nung toss koka batting shim shia lir.

## Lionel Messi aser Alexia Putellas nati 'Ballon d'Or Award' angu

**Paris, Yimpoksüi November 30, 2021 (Agencies):** Barcelona nung küm talangka junga asaya arur aser Argentina den mezüing International trophy takok anguba sülen, Hombarnü Lionel Messi-i tenetbenbuba Men's Ballon d'Or award nguogo. Barcelona aser Spain den season nung alakteta junga asayaba atema Women's Ballon d'Or award takok angur rongnung Alexia Putellas tasembuba kümogo. International asayamung final pezü tashi nung tamakok anguba sülen, taküm July ita arishi küm 34 tain Messi'er team - Argentina-i Copa America title takok angu. "Iba sabang nung noktaksü aser trophy tasen atema tokteptsü maongka anguba asoshi kanga pelar. Küm kwika asayatsü (football) aji ni memetet, saka küm aika asayatsü imlar. Barcelona aser Argentina nung taoba mapang külem asayartem dang pelaba lemsateper," ta Messi-i ashi. Messi-i point 613 shi ngua pai Bayern Munich aser Poland striker Robert Lewandowski (580) ajangetta temaba jenjang nung tembang. "Robert den tokteptsü maongka anguba ya khonang ka ama ta ni shinür aser taoba küm nai iba award agizükba ya nü dak kanga langa lir ta ajaki ashitsü," ta Messi-i ashi. France Football magazine ajanga agütsüba Ballon d'Or

Award ya Stanley Matthews-i akokba mapang 1956 nungi tenzüka küm shia agüja arudar. Arish küm 33 tain Lewandowski-i goal 41 tashi inokja Bundesliga atema season ka nung goal timba record yangluogo, koba Germany nunger asür Gerd Müller dang nungi goal kati timba asütsü. February nungi September tashi tetoktepba asayamung ajak nung Lewandowski-i Bayern atema game 19 nung atonga goal idaktsü aser Bundesliga game 16 nung pai Gerd record memenep. Tan season nung Bayern Munich atema Lewandowski-i asaya 20 nung goal 25 idaktsü. Taküm, Poland atema asaya 12 nung Lewandowski-i goal 11 tashi idakja International game 128 nung goal 74 idaktsür asütsü, koba goal 6 agi Messi dang nungi tajemba asütsü. Chelsea aser Italy midfielder Jorginho-i London club (Chelsea)-i Champions League aser Italy team-i European Championship takok angutsü asoshi shilem tajung agiba sülen, pai point 460 ngua jenjang tasembuba tongtet. Real Madrid aser France team nung forward asayar Karim Benzema-i point 239 ngua jenjang pezübuba tongteta Iiasü. Barcelona atema Putellas-i shilem tajung agiogo aser game 42 nung lai goal 26 inoktsü. Champions League final nung Barcelona aser Chelsea na



Paris, Yimpoksüi/November 30, 2021: Theatre du Chatelet, Paris nung 65buba Ballon d'Or sentong agiba mapang, Paris Saint Germain nungi asayar Lionel Messi-i Ballon d'Or Trophy agizüker sülen tangokba noksa ka yangi angur. Messi-i Ballon d'Or Trophy tenetbenbuba takok angur asütsü.

asayaba mapang midfielder Putellas-i goal idaktsü aser August nung la nem 'UEFA women's player of the year' naroküm agüja Iiasü. "Kü nem iba tetushi award agütsüba atema pelar aser kü mulung nung konghshio. Külem team pur talisa Barcelona nung külem asayartem dang pelaba lemsateper. Parnok teyari ajanga iba award agizüker," ta Paris nung sentong agiba mapang, Putellas-i ashi. Taoba mapang, Norway tsür striker Ada Hegerberg (2018) aser America tsür forward Megan Rapinoe (2019) nati Women's 'Ballon d'Or award agizüka lir. Coronavirus tenokdangba ajanga taoba season masayatet asünung 2020

küm iba award sentong thinena Iiasü. Putellas-i club aser linük nung külem team pur Jenni Hermoso (84) dang nungi point timba (186) ngutet. Season tasembuba atonga Spanish first division nung goal timtiba idaktsür rongnung Hermosa kümogo. Iba season nung lai goal 31 idaktsü. Chelsea aser Australia striker Sam Kerr-i English Women's Super League nung goal 21 aser Tokyo Games nung Australia atema goal 6 idaktsüba sülen, lai tasembuba

jenjang ajangzüketet. Tan season asaya 12 nung Kerr-i goal 13 idaktsü. \* **Ballon d'Or Awards 2021 takok angurtem:** - Kopa trophy (best player under 21) - Barcelona's Pedri - Best Striker of the Year award - Lewandoski - Women's Ballon d'Or 2021 - Barcelona's Alexia Putellas - Yachine Trophy 2021 - PSG's Gianluigi Donnarumma - Men's Ballon d'Or 2021 - PSG's Lionel Messi. - Club of the Year award - Chelsea

### BILEM DANGANG

"Rongsen dak temlung alemerji per metsür den tepila mali."